

# Grippa e sport dan bler da far

Temp intensiv i'l Ospidal d'Engiadina Bassa

DA FLURIN ANDRY / ANR

■ **La gripa d'ingon ha procurà per du-blamaing paziants da gripa i'l OEB a Scuol. Causa las bunas relaziuns da naiv s'haja dombrà qua eir fich blers paziants cun blessuras da sport.** Grondas activitats i'ls piertans da l'Ospidal d'Engiadina Bassa (OEB): Chürunzas e chürunzs e bleras visitas passan aint ed oura da quels. Üna gronda part da las visitas sun vestidas cun büschmainta da sport d'inviern: Ellas spettan la diagnosa dals meidis, quant ferm cha lur partenari, ami o cuntschaint s'haja ferì e quant lönch ch'el stopcha star a l'ospidal. «Illa partiziun chirurgia da nos ospidal vaina trattà ingon var 400 paziants ambulantaing ed ill'ura da consultaziun», infuormescha *Frank Kuhlhoff*, schefmeidi chirurgia.

## Impustüt fracturas da la bratscha

Paziants staziunaris han trattà ils meidis da la partiziun chirurgia da l'OEB ingon 87 persunas: «Quai sun 12 paziants daplü co l'on passà, quai chi correspuonda ad ün augmàint da s-chars vainch pertschient», disch il meidi, «e quai davo cha fingià l'on 2008 es stat per l'ospidal ün on intensiv.» Il motiv per quist grond numer d'accidaints sun sco ch'el suppuona las bunas relaziuns da naiv e la bell'ora chi varan attrat daplüs giasts co oters ons süllas pistas. «Ils accidaints sun sumgliaints a quels dals ultims ons», declera *Frank Kuhlhoff*, «la gronda part sun fracturas da la bratscha, da las listiras dal batschigl e da la part suot da la chomma e da l'öss dal vantrigl.» Implü han ils chi-

rurgs trattà ambulantaing eir diversas feridas da la schnuoglia, «impustüt rupturas dals bindels cruschats». Per blers paziants in l'ospidal ha pisserà ingon eir l'uonda da gripa.

## Il dubel dals ons normals

Minch'on dombra e publichescha l'Uffi-

zi federal da sandà publica il numer dals amalats da gripa. «La curva da quist on muossa ch'è es bod il dubel da paziants da gripa co ils oters ons», disch *Clemens Neumeier*, co-schefmeidi medicina da l'OEB, «quai vezzaina eir qua i'l ospidal, probabelmaing trattaina pro no il dubel da paziants causa infecziuns viralas da

gripa co normalmaing.» Quai chi influenzescha eir la quantità da paziants da gripa sun sco ch'el disch las masüras preventivas. Ch'el haja let d'incuort cha giò la Bassa as lascha vaccinar cunter la gripa be desch pertschient dal personal da chüra: «Pro no i'l OEB esa la mità dal personal da chüra e tuot ils meidis ch'è

laschan vaccinar.» Chi saja bod amo plü important cha meidis e'l personal da chüra as lascha vaccinar co la glied veglia svesa, declera il meidi: «Sco meidi e chürunz s'esa confruntà permanentaing cul virus grippal ed uschea quasi predestinà da til dar inavant.» Il motiv chi dà istess amo blers chi nu's laschan vaccinar es tenor el l'infuormaziun mangluossa: «Per part exista la temma na güstifichada da gnir amalà causa la vaccinaziun», disch *Clemens Neumeier*. Chi detta eir da quels vaccinati chi tschüffan aint da fraid e chi pensan lura cha quai saja la cuolpa da la vaccinaziun. «Quai nu correspuonda però a la realtà, quai es üna fosa infuormaziun», intuna il meidi, «il dafraid es bainschi stantus, cun üna dretta gripa però s'esa ferm amalà.» Perquai s'haja il böt d'augmentar amo la quota da vaccinaziun i'l OEB.



**Pel mumaint han meidis e personal da l'Ospidal d'Engiadina Bassa bler da far.**

FOTO F. ANDRY